


TEZAU LITURGIC
1 APRILIE

ACATISTUL
SF. CUVIOS
EFTIMIE
DE LA SUZDAL



MOSCOVA, 2000



Акафист
святому преподобному
Евфимию, архимандриту
Суздальскому, чудотворцу

Кондак 1

Избранный по предуведению Божию
угодниче Христов, преподобне отче Евфимие!
Прославляюще Господа Славы, давшего в тебе
граду Суздаю и всей православной державе
русской крепкаго заступника и молитвенника, и
в бедах помощника и утешителя, похвальное
восписуем ти пение; ты же твоими теплыми
молитвами у Престола Святыя Троицы от всяких
бед душевных и телесных вся ны избави,
зовущия ти:

Радуйся, Евфимие, скорый помощниче и
преславный чудотворче!

Икос 1

Ангельское житие иночествующих от юности
возлюбил еси, преподобне Евфимие, и Богу

Единому работати всем сердцем еще в отрочестве своем возревновал еси. Сего ради взываем ти:

Радуйся, отроча кроткое и благопокорливое; радуйся, родителей утешение.

Радуйся, с любовью прилежавый книжному учению;

радуйся, ведению Господа и Его заповедей учиться возлюбивый.

Радуйся, вся утехи детские презревый;

радуйся, Божественными токмо от юности веселяйся.

Радуйся, селения Господа Сил паче всего возлюбивый;

радуйся, душею своею и скончаватися во дворех Господних возжелавый.

Радуйся, в храме Божиим, якоже пред Лицем Самого Господа, выну предстоявый;

радуйся, ум свой весь к Единому Богу устремивый.

Радуйся, яко ничтоже земное в храме помышлял еси;

радуйся, со страхом и трепетом Богу предстоявый.

Радуйся, Евфимие, скорый помощниче и преславный чудотворче!

Кондак 2

Видя подвиги и молитвенныя труды Дионисия, в пещере близ Нижняго Новаграда жительствующа, притекл еси к нему, и лобызая нозе его, со слезами того молил еси, еже причтену ти быти к лику иноков, да вопиеши купно с ними: Аллилуия.

Икос 2

Разум слышаннаго тобою словесе Евангельскаго: «Кая польза человеку, аще мир весь приобрящет, душу же свою погубит», добре уразумев и на скрижалех сердца тое начертав, мирская вся презрел еси, о спасении же души твоея точию ревновал еси, Царствия Божия и правды его прежде всего искати научая вся ны, вопиющия ти:

Радуйся, земная презревый;
радуйся, небесная возлюбивый.

Радуйся, яко от юности на стражбу Божию стал еси, да утреннюеши к Богу;

радуйся, в чтении и пении церковных поучавыйся день и ночь.

Радуйся, из млада млекою слова жизни питавыйся;

радуйся, во благодати у Бога и человек непрестанно возраставый.

Радуйся, в тайне от людей молитися возлюбивый;

радуйся, от Видящаго яже в тайне, яже прославленный.

Радуйся, во отрочестве не с земными сверстники, но с небесными Ангелы содруживыйся;

радуйся, всего себе Богу предавый.

Радуйся, целомудрия ревнителю;

радуйся, чистоты хранителю.

Радуйся, Евфимие, скорый помощниче и преславный чудотворче!

Кондак 3

Сила Вышняго осени ты, преподобне Евфимие, егда мира отвергся, иноческое житие восприял еси, по непреложному обетованию Божию, тебе изреченному при пострижении: «Аще и мать забудет отроча, Аз не забуду тебе»; сего ради к лику иноков причтен быв, вопиял еси Богу: Аллилуия.

Икос 3

Имея в иночестем житии мудраго наставника блаженнаго Дионисия, преуспевал еси, преподобне, в подвизах и трудах, восходя от силы в силу, да совершен иннок явишися. Мы же, воспевая подвиги и труды твоя, взываем ти сице:

Радуйся, послушания добрый рачителю;
радуйся, на всякую службу Господа ради присно готовый.

Радуйся, со уготовлением брашна братии ум свой возводивый к вечери Агнца, избранным уготованной;

радуйся, зрением огня в печи возгревавый в себе память огня геенскаго.

Радуйся, яко во измовении рук труждася,
убелити душу твою, яко снег, поревновал еси;

радуйся, яко, измывая срачицы, облещися в
хитон заслуг Христовых возлюбил еси.

Радуйся, яко древа посекаяя, из сердца твоего
вся нечистыя мысли и желания исторгал еси;

радуйся, яко зрением сухих деревьев, якоже
притчею о смоковнице, плодоношению добрых
дел поучался еси.

Радуйся, во образ младенческаго незлобия и
яко шлем упования куколь восприемый;

радуйся, во власяницу, яко в знамение
умерщвления плоти, облекийся.

Радуйся, аналав, яко броню неоторимую, на
рамена возложивый;

радуйся, яко спогребшийся Христу, милостию
одеянный.

Радуйся, Евфимие, скорый помощниче и
преславный чудотворче!

Кондак 4

Бури житейских волнений в тихом
пристанищи обители иноческаго избегл еси и
росою воздержания угасил еси, преподобне,

юношеский пламень страстей; огнем же страданий попяля приражения мира прелестнаго, постом и молитвою душу твою светлее лучей солнечных просветил еси, вопия Богу: Аллилуия.

Икос 4

Слышав моление князя Суздальскаго, о еже даровати наставника и строителя обители во граде его, блаженный Дионисий тя яко предтечу предпосылая пред собою в страну, идеже предопредели ему Бог святительствовати, тебе, преподобне отче, ввери сие дело, и не хотящу ти удалитися от отца твоего; ты же, яко сын послушания, волю свою Господу покоривый, Егоже вся есть земля, последовал еси воли наставника; темже ублажая тя, взываем ти сице:

Радуйся, яко Авраам, послушания ради Гласу Божию, отечество твое Нижний Новград, обитель и знаемых оставивый;

радуйся, Небеснаго Отечества ради в земнем отечествии странен явивыйся.

Радуйся, спасению других послужити готовый;

радуйся, иноческаго братства добрый вождю.

Радуйся, благословение отца своего духовнаго и молитву, яко копие острое, на поражение невидимых враг приемый;

радуйся, духом молитвы от него не отлучивыйся.

Радуйся, обитель святаго Василия устроивый и тамо иноков собравый;

радуйся, при отшествии из обители сея путничный твой посох тамо на благословение оставивый.

Радуйся, яко во граде Суздале благословения Божия во храме Пресвятыя Богородицы прежде всего искал еси;

радуйся, яко святителя Иоанна благоговейно почитал еси.

Радуйся, яко от архиерея Божия молитвы и благословения на дело твое прежде всего испросил еси;

радуйся, во еже дело повеленное совершити усердно потрудивыйся.

Радуйся, Евфимие, скорый помощниче и преславный чудотворче!

Кондак 5

Боготечная звезда явился еси, преподобне, небо церковное украшая, град Суздаль светом своим осиявая и плавающая во мраце житейских попечений к тихому пристанищу иночества наставляя, да вопиют вси Богу: Аллилуия.

Икос 5

Видев со епископом и князем место благопотребно на горе, идеже храму Преображения Господня создатися, яко Петр на Фаворе мыслил еси: «Добро нам zde быти, и сотворим сени братии», ведый яже глаголеши; темже со всеусердием трудился еси в созидании храма и жилищ иноком. Мы же, зряще совершение дела и столпостение обители, радостно взываем ти:

Радуйся, здателю мудрый;
радуйся, домостроителю верный.

Радуйся, яко мотыкою углубляясь в землю, духом твоим нисходил еси во глубину смирения;

радуйся, яко земная недра разрывая, возделовал еси в себе добродетели.

Радуйся, при устройении храма Божия на земли, о храме вечнем на небеси выну помышлявый;

радуйся, в чаянии жизни вечныя устройвый гроб себе под кровом, идеже безкровная приносится жертва.

Радуйся, своима рукама истесавай камни для гроба своего;

радуйся, выну память смертную имевый.

Радуйся, постом, молитвою и слезами место обители освятивый;

радуйся, пусто место во благоплодный вертоград Христов преобразивый.

Радуйся, при реце веселящей град, обитель иноков яко мост к небеси преводяй, устройвый;

радуйся, строителю обители, процветшия яко крин в стране Суздальстей.

Радуйся, Евфимие, скорый помощниче и преславный чудотворче!

Кондак 6

Проповедник богоносный быв, преподобне, истинному боговедению и благочестию поучал еси присно братию свою и вся люди земли

Суздальския словом спасения, паче же образом жития своего наставляя на путь спасения, да вопиют вси Богу: Аллилуия.

Икос 6

Возсия благоверному князю святость жития твоего, отче Евфимие, егда узре Ангела Божия сослужаща ти и святителю Иоанну при Божественней литургии, якоже иногда спостнику и собеседнику твоему преподобному Сергию; мы же, тако прославивша тя Господа славяще, вопием ти:

Радуйся, пастырю добрый вверенных тебе словесных агнцев;

радуйся, вождю добрый, сильный словом и делом.

Радуйся, винограда Христова насадителю и хранителю;

радуйся, вертограда Господня благоискусный делателю.

Радуйся, таин богоизбранный строителю;

радуйся, немощей братии врачу богомудрый и скорый целителю.

Радуйся, свирель dobroгласная, песнями
духовными веселящая души человекoв;

радуйся, псалтирь, славу Божию
возвещающая.

Радуйся, печальных утешение;

радуйся, обидимых заступление.

Радуйся, Божия благодати струе
неизсякающая;

радуйся, милостей Божиих присный ходатаю.

Радуйся, Евфимие, скорый помощниче и
преславный чудотворче!

Кондак 7

Хотя добре упаствити вверенную ти от Бога
паству, заповедал еси в храме и трапезе
молчание, в келлии молитвенное пребывание,
всякого мудрования отсечение, своих стяжаний
отчуждение, чистоты и целомудрия хранение, и
всех иноческих обетов верное соблюдение, да
возможеши, представ Страшному Судищу
Христову, рещи: «Се аз и дети, яже ми дал еси»,
и воспети вкупе с ними: Аллилуия.

Икос 7

Новаго тя молитвенника, заступника и помощника в бедах стяжаша людие суздальстии: ты бо гладным питание, больным упокоение, должником искупление, утесняемым на суде заступление подавал еси; мы же сих ради благодарственная ти восписующе, взываем к тебе сице:

Радуйся, любви Отца Небеснаго подражателю; радуйся, братию твою любовьию Христовою возлюбивый.

Радуйся, ближним, якоже и Христу Самому, служивый;

радуйся, благословение Отца Небеснаго милостынею наследовати поревновавый.

Радуйся, подвиги поста, молитвы и бдения любовьию увенчавый;

радуйся, любовь — союз совершенства стяжавый.

Радуйся, любви к ближнему основание в любви к Богу положивый;

радуйся, веру свою и любовь к Богу делы явивый.

Радуйся, яко сын правыя веры и чистыя любви Богу усыновивыйся;

радуйся, Святыя Троицы благоуготованное селение явивыйся.

Радуйся, в Бозе пребываяй;

радуйся, яко Бог в тебе пребывает.

Радуйся, Евфимие, скорый помощниче и преславный чудотворче!

Кондак 8

Странен и убог внешним видом являлся еси, преподобне, худыми ризами прикровен и милотию ветхою одеян, тоужде в зной летнем и в хладе зимнем, внутрь же добродетельми преукрашен был и чистотою сиял еси, воспевая Богу: Аллилуия.

Икос 8

Вся страна Суздальская, светом твоих добрых дел и полезных учений осияваема, прославляше о тебе Отца Небеснаго и яко ангела земнаго и человека небеснаго тя почиташе. Темже и мы отонуду пети научихомся тебе таковая:

Радуйся, всякия добродетели усердный делателю;

радуйся, смирения избранный сосуде.

Радуйся, молитвою и слезами душу
очистивый;

радуйся, постом и веригами железными плоть
умертвивый.

Радуйся, Царство Небесное нищетою духа
наследивый;

радуйся, вечное веселие плачем
исходатайствовавший.

Радуйся, в наследие землю Небесную
кротостию уллучивый;

радуйся, яко за алчбу и жажду правды
восприял еси насыщение благами вечными.

Радуйся, яко милости ради от Бога помилован
был еси;

радуйся, чистотою сердца зрети Бога
сподобивыйся.

Радуйся, яко миротворения ради, в сынех
Божиих нарещися сподобился еси;

радуйся, яко терпением и злострадании мзду
многую стяжал еси.

Радуйся, Евфимие, скорый помощниче и
преславный чудотворче!

Кондак 9

Всякое духовное утешение почерпал еси, преподобне, от содружества с великим Сергием, словом спасения в беседах назидаяся, подвиги иноческие с ним разделяя и купно воспевая Богу: Аллилуия.

Икос 9

Витийствующий язык не может по достоянию восхвалити труды твоя, подвиги и всякую добродетель твою: от юности бо до маститыя старости неустанно Богу работал еси, труды ко трудом прилагая и восходя от силы в силу, да вообразится в тебе Христос, Егоже ради подвизался еси, Егоже возлюбил еси, Егоже вождеде душа твоя. Настави убо на путь Христовых заповедей и нас, взывающих к тебе сице:

Радуйся, от младых ногтей до престарения всю жизнь твою Богу посвятивый;

радуйся, делая в вертограде Христове, тяготу и вар дне понесый.

Радуйся, в жизни присно о смерти помышлявый;

радуйся, выну предстати Страшному Судищу Христову готовивыйся.

Радуйся, умерый миру и плоти прежде успения своего;

радуйся, воскресый духом прежде преития в райская селения.

Радуйся, подвигом добрым подвизавыйся;
радуйся, честне земное течение скончавый.

Радуйся, рабе верный, в радость Господа своего вшедый;

радуйся, доблий воине Царя Небеснаго, венец славы вечныя приявый.

Радуйся, яко Престолу Царя Славы предстоиши;

радуйся, яко Христу Царю молитвы о нас приносиши.

Радуйся, Евфимие, скорый помощниче и преславный чудотворче!

Кондак 10

Спасти хотя всех, твоего наставления требующих, грешных призывал еси к покаянию, болящим подавал еси исцеления молитвою твоею, братии имети любовь между собою

заповедал еси, и в час смертный, всех благословляя и прощение коемуждо подавая, неотступен от обители твоея обещался еси пребыти духом твоим, егоже с миром предал еси Богу, вопия Ему: Аллилуия.

Икос 10

Стена был еси и ограждение и по преставлении обители твоея и добрых уставов иноческаго жития: небрегуща бо об обители архимандрита Евфимия огневицею поразил еси, келаря же Киприана, устава, даннаго тобою, несоблюдша, разслаблением вразумил еси; темже мы, прославляя тя, яко неусыпнаго стража обители, взываем ти таковая:

Радуйся, яко паству твою, с нею живый, добре упасл еси;

радуйся, яко и по смерти благоустрои ти ю не престаеши.

Радуйся, устава добраго общежития насадителю;

радуйся, присный его охранителю.

Радуйся, нерадящих строгий обличителю;

радуйся, кающимся скорое прощение подавая.

Радуйся, пастырей умудрение;
радуйся, иноков научение.

Радуйся, обещавай, яко не оскудеет обитель
твоя;

радуйся, обетования сего исполнение
исходатайствовавай.

Радуйся, дерзновение к Богу получивый;

радуйся, присно о чадах твоих
предстательствуяй.

Радуйся, Евфимие, скорый помощниче и
преславный чудотворче!

Кондак 11

Пение всеумиленное приносим дивному во
святых Богу, за еже мощи твоя, угодниче
Божий, яко сосуд благодати полный и
преизливаяйся, нам даровал еси: презрением бо
тленнаго мира и плоти умерщвлением не токмо
вечное блаженство духом, но и плоти нетление
улучил еси, и истекшим ступлетом пребывания в
земле светел лицом и в ризах неистленных
обретен был еси; сего ради вопием Богу:
Аллилуия.

Икос 11

Светлосияющую свещу, сущим во тьме явленную, зрим раку святых мощей твоих, преподобне Евфимие; при ней бо мраком беснования одержимии просвещаются, изступлении умом и расслаблении телом здравы содеваются, огонь трясавицы угашается, и многая неисчетная чудеса совершаются, о нихже дивящися, вопием ти:

Радуйся, яко восходя на небо, мощи твоя святых нам оставил еси;

радуйся, яко мощи твоя исцеляют всякия скорби и болезни.

Радуйся, яко мощей твоих демони трепещут;

радуйся, яко твоя мощи комуждо в приключшихся печалех бывают утешение.

Радуйся, яко вериги и жезл твой чудодействуют;

радуйся, источниче, струю обильную исцелений точащий.

Радуйся, многообразных чудес подателю;

радуйся, по твоем отшествии от земли нас не оставляй.

Радуйся, из небесных сокровищ блага нам, на земли сущим, низпосылаяй;

радуйся, на земныя скорби и нужды наша призираяй.

Радуйся, к молитвам скоро слух свой преклоняяй;

радуйся, на помощь быстро готовый.

Радуйся, Евфимие, скорый помощниче и преславный чудотворче!

Кондак 12

Благодать свыше приял еси, преподобне, заблуждающихся на путь истины обращати, грешников к покаянию призывати; не презри под кровом обители твоея требующих духовнаго врачевания и целения, всякое неправомыслие исправляя и всякий греховный недуг отгоняя, да вси едиными усты и чистым сердцем вопием Богу: Аллилуия.

Икос 12

Поюще многия твоя, преподобне Евфимие, подвиги и труды в жизни сей, ублажаем приснопамятное успение твое, торжествуем и о Божественней славе твоей в Небесном

Царствию, и, припадающе к раце
многоцелебных мощей твоих, со умилением
взываем ти сице:

Радуйся, мужу желаний, в телеси и душе Бога
прославивый;

радуйся, в невечерний день Царствия Божия
зрети сподобивыйся.

Радуйся, в книгу животную вписанный;

радуйся, Горняго Иерусалима жителю.

Радуйся, в раю сладости водою жизни
напаяемый;

радуйся, плодами древа жизни насыщаемый.

Радуйся, в свете Славы Божия и светильника
Агнца обитаяй;

радуйся, Престолу Господа Вседержителя
предстояй.

Радуйся, в селения, отнюдуже отбеже всяка
печаль и воздыхание, вселивыйся;

радуйся, в горней скинии Божией, на нейже
почиет благословение, веселяйся.

Радуйся, Вечери брака Агнца приобщивыйся;

радуйся, со всеми святыми во Царствии
Небеснем ликовствуяй.

Радуйся, Евфимие, скорый помощниче и преславный чудотворче!

Кондак 13

О преславный чудотворче, преподобне и богоносне отче Евфимие! Приими ныне сие усердное моление наше и умоли Милостиваго Бога, да дарует Церкви мир и тишину, царю крепость и долгоденствие, всем нам душевное спасение и от всех бед избавление, и твоим теплым ходатайством будущия изми муки нас, аще и недостойне, вопиющих Богу: Аллилуия.

Этот кондак читается трижды, затем икос 1 и кондак 1

Молитва

Преподобне и преблаженне отче наш Евфимие, вонми нам, к тебе смиренно припадающим и твоего заступления тепле просящим. Веси немощи наша, веси грехи наша, но и усердие наше не утайся от тебе. Умоли Милостиваго Спасителя нашего, Господа Иисуса Христа, даровати нам оставление многих согрешений наших и утвердити нас на пути делания заповедей Его. Огради нас твоими молитвами от всех искушений и бед, отврати

належащия нам скорби и напасти, даруй нам в здравии, мире, тишине и благоугождении Богу провождати дни жития нашего, испроси нам время на покаяние и ответ благоприятен на Страшнем Судищи Христове, да с тобою и со всеми избранными славим вечно Отца и Сына и Святаго Духа. Аминь.

